

UA TAOFIA E JANEELYN LE FAASOLOGA

Sa matuai manao lava o ia
e vaai i le isi vitio. Ma le isi.
Ma le isi.

**Saunia e Charlotte Larcabal
Speakman**
(E faavae i se tala moni)

O lenei tala na tupu i Meleisia.

Sa faasolo e Janeelyn lona
limamatua i le isi itu o le lau
o le telefoni. Vitio na feemoemoai
mai. Sa taofi o ia e matamata
i se tasi, ona toe faasolo lea. Ona
ia taofi lea i se isi vitio. Sa tele
gagana leaga, ae sa malie, o lea sa
ia matamata ai pea. Ona faaauau
ai lea ona faasolosolo.

“Janeelyn! E te fia tusi ata?”
Sa faalelea mai e lona uso laitiiti
o Jojo se fasi pepa.

Sa tilotilo a’e i luga Janeelyn. “E
le o le taimi nei.”

“Ua lelei.” Sa faanono Jojo
ma tuu i lalo le pepa.

Faasolo. Faasolo. Faasolo.
Vitio o manu aulelei. Vitio
o tagata lauiloo. Vitio o tamaiti
o loo sisiva. Ma ni nai vitio
na iloa e Janeelyn e le lelei
i le matamata. Ua lelei,
atonu e sili atu nai lo nisi. Sa
amata ona lagona e Janeelyn
e tatau ona taofi lona
matamata iai.

*Ae sa tusia foi e tagata le
tele o mea mananaia, sa ia
mafaufau ai. Sa ia aaoaina
foi ni auala fou e tusi ai ata
mai ni nai vitio.*

“Janeelyn,” na valaau atu
ai Tina.

“Aaa?” E lei tilotilo i luga
Janeelyn i le taimi lea.

O loo fai le tatou alaisa falai
meaisami nanei,” o le tala lea
a Tina. “E mafai ona e fesoasoani ia
te a’u i le faiga?”

Sa fiafia Janeelyn i le alaisa falai
meaisami. Ae sa lei manao o ia
e tu i luga i le taimi lea.

“E mafai ona ou setiina le
laulau?” sa ia fesili ai. “E mafai foi
ona ou fesoasoani i ipu pe a maea.”

“Ua lelei lena,” na fai mai ai Tina.
“Ae e tatau ona e faatulagaina
sa’o pe a ou fesili atu ia te oe. Ona
oo lea i le taimi e toe faafoi ai le
telefoni. Malie iai?”

“Malie,” o le tala lea a Janeelyn.

Sa matamata pea Janeelyn i vitio.
Sa ia toe lagonaina foi e le tatau

ona ia tilotilo atu iai. Ae sa matuai
manao lava o ia e matamata i le
isi vitio. Ma le isi. Ma le isi. *Faasolo.
Faasolo.* Sa faigata ona taofi!

Mulimuli ane na tuu ai i lalo
e Janeelyn le telefoni. Ia, atonu
sei ona faaumaina le vitio
mulimuli lea . . .

*Leai, sa ta’u atu ma le mausali
e Janeelyn ia te ia lava. Sa uunaia
o ia e le Agaga Paia, ma sa ia
manao e faalogo. Sa latalata pea
lona lima i le telefoni. Sa matuai
faatosa lava! Sa moeiini mata o
Janeelyn.*

*Tama Faalelagi pele, sa ia tatalo
le leoa. O loo ou taumafai malosi
e faalogo i le Agaga Paia, ae ou
te manaomia le fesoasoani. Ou te
manao e taofi le matamata i nei vitio,
ae ou te le o mautinoa pe faapefea.
I le suafa o Iesu Keriso, amene.*

O le taimi lava lena, na valaau
atu ai Tina ia te ia e seti le laulau.
Sa oso i luga Janeelyn ma ataata.
O se tasi lena o auala e fesoasoani
e aveese ai o ia mai le telefoni.

Sa faatulaga e Janeelyn ipu
mafolafofa i luga o le laulau. “Tina,
sa ou vaai i ni mea leaga i luga o le
telefoni,” sa ia ta’u atu ai.

Sa ea a’e Tina mai lana kuka.
“O a ituaiga o mea?”

“E pei lava, o upu leaga ma
vitio leaga.” Sa faamimigi tauau
o Janeelyn. “Ae e le leaga uma.”

“O le a se mea na e faia ina ua
e vaai i mea leaga?” O le fesili lea
a Tinā.

Sa filemu Janeelyn mo sina taimi.
Sa ia setiina se ipu inu i nofoaga
taitasi.

“Sa ou matamata pea,” na ia fai
atu ai. “Ou te lē iloa pe aisea. Ae

na ta’u mai e le Agaga Paia ia te a’u
e taofi, o lea sa ou faia ai se tatalo
mo se fesoasoani.”

Sa seti e Tina se ipu meaii vela
o le alaisa falai meaisami i luga
o le laulau. “O nisi taimi e faigata
tele ona tuu le faia o mea e tusa
lava pe tatou te iloa e leaga,” o lana
tala lea. “Ma a tupu lena mea, o le
mea sili e mafai ona tatou faia o le
tatalo.”

Sa ataata Janeelyn. “Na ou iloa
na ou faia le mea sa’o.”

“Ua e mautinoa lava.” Sa tuu atu
e Tina ia Janeelyn sipuni e tuu i luga
o le laulau. “Ma e le leaga tele le
initoneti. E mafai ona fesoasoani
ia i tatou e fesootai ai ma uo ma
fefaasoai manatu. Ae e mafai foi

ona faigata ona aloese mai mea
leaga uma. Amata atu nei, afai
o le a e matamata i vitio, tatou
matamata faatasi i ai. Ina ia mafai
ai ona ma fesoasoani ma Tama pe
a e matamata i se mea leaga.”

Sa luelue le ulu o Janeelyn. O le
isi taimi o le a ia matamata faatasi
ai ma Tina ma Tama i vitio. Ae seia
oo i lena taimi, sa tele ni mea malie
e mafai ona ia faia e aunoa ma le
telefoni.

“E mafai ona e ta’u atu i
tagata uma ua oo i le taimi o le
taumafataga o le afiafi?” O le fesili
lea a Tinā.

“Toe! Ma a uma le taumafataga
o le afiafi, o le a ou tusia ni ata ma
Jojo!” ●

